

TATA IBADAH MINGGU PELAJAR GKPS

Minggu II Dob Trinitatis
29 Juni 2025



TEMA:
“HASADAON PAKON PANGIDANGION NA MARBUAH”
(KOLOSSE 1:10)

SUB TEMA:
**“Lambin Surung ma Ibagas Horja ni Tuhan Halani Domma Ipilih
Janah Itotapkon Hita Laho Marbuah”**
(Johannes 15:16; 1 Korint 15:58)

Dilo-dilo Marhasadaon

Siboan Doding: Horas ma hubanta ganupan.
Nasiam hasoman, nini hata ni Tuhan, “Biar mangidah Jahowa do parmulaan ni habotohon,” anjaha “Jahowa do sibere hapentaran, humbani pamangan-Ni do roh habotohon pakon hauhuron.” Dihut do GKPS mendukung peningkatan pasal habotohon ampa hapentaron, sonai homa pengembangan diri bani ganup jolma, termasuk hubani ganup pagori ni GKPS. Ai do ase ibaen hita sada Minggu khusus pasal ai, aima Minggu Pelajar GKPS. Pungkah hita ma ibadahta, ase riap ma hita jongjong.

Prosesi (Doding: Halleluya No. 412:1-2)

*Marodor na porsaya ganupan,
na laho misir hu parmingguan, damei do tongtong.
Tunggung jagiah do idahon,
minar do bohi ni ganupan, damei do tongtong.*

*Talup janah pantun marpahean,
songon na laho hu parpestaan, damei do tongtong.
Rosuh tumang uhur maniru,
halani dear ni parlahou, damei do tongtong.*

1. Votum, Introitus, Tonggo

P. Ibagas goran ni Naibata Bapa pakon Tuhan Jesus Kristus ampa Tonduy Na Pansing, Sitompa langit pakon tanoh on. Amen.
“Age pe mardalan ahu bani lombang bagas ni hagolapan, seng mabiar ahu, ai Ham do mangkasomani ahu; tungkot-Mu pakon simambu-Mu do na mangapohi ahu.” *(Psalmen 23:4)*
Halleluya. Halleluya. Halleluya.
K. *(Mandodingkon) Halleluya. Halleluya. Halleluya.*
P. Martonggo ma hita.
Ham Tuhan Naibata Bapanami, martumpu do hanami bani ari na pinapansing-Mu on. Ajari Ham ma hanami mamuji pakon pasangapkon goran-Mu marhitei hata ampa pambahenannami. Buhai Ham uhurnami marhitei Tonduy-Mu na pansing in, ase marmalas ni uhur hanami mambalosi janah mangkorjahon hata-Mu, ai hata-Mu in do hagoluhannami. Marhitei Jesus Kristus Sipaluah in roh hanami mangelek hu Bamu. Amen.

(hundul kuria)

2. Doding: Halleluya No. 388:1-2

*Ham o Naibatanku na manompa au, ai na loja dagingkon,
ibaen goluhkon; sai bulinsah au.
Seng dong i tanoh on haporusanku.
Pitah Ham do haposankin, togu Ham au na loja on.
Pitah Ham do haposankin, togu Ham au na loja on.*

*Ham o Tuhan Jesus, na manobus au, ai na pusok uhurhon,
ibaen dousangkon, sai holsohan au.
Seng dong i tanoh on haporusanku.
Pitah Ham do haposankin, togu au na marhoru on.
Pitah Ham do haposankin, togu au na marhoru on.*

3. Hasasapan ni Dousa

P. Riap ma hita jongjong.
Martonggo ma hita, sopotkon hita ma dousanta hubani Tuhan Naibata.
Ham Tuhan Naibata, Bapanami na i nagori atas, paridop ni uhur mangidah hanami. Na roh do hanami jolma pardousa on hu lobei-Mu, mansopotkon dousanami na buei in. Hotop do hiranana hasoman, na mangarapkon pambahenan na madear humbannami. Gati homa do hanami lang sari hubani hasoman janah gati hanami hurang sirsir manjalo pardearan humbani hasoman. Habasaron, halayakon pakon lumbang ni uhur, gati lang jumpah bannami.

..... saat hening

Hurang sirsir mangarusi pingkiran ni hasoman, parsahap pakon pambahenannami gati parroh ringis ni hasoman, gati lang na madear ibahen hanami balos ni na lang madear na binahen ni hasoman dompak hanami. Hurang do hanami manonggohon hasomannami. Hurang ringgas do hanami mangapohi halak na ibagas pusok ni uhur, patugahkon halak na ibagas hagalekon pakon pandoleian.

..... saat hening

Sonai age padannami dompak Ham, gati do lang isuhuni hanami. Halani ai ma ase roh hanami mansopotkon dousanami. Maidop ma uhur-Mu, sasap Ham ma dousanami in. Pargogohi janah ajari Ham ma hanami mandalankon hata-Mu ibagas goluhnami. Ipangindo hanami on hu Bamu, ibagas goran ni Anak-Mu Yesus Kristus, Tuhan janah Sipaluah hanami. Amen.

Tangar anjaha haporsyai hita ma Hata ni Naibata, bagah-bagah pasal hasasapan ni dousa: On do ibahen Naibata: Manghopkop hita gabe dousa do Ia, na so mananda dousa, ase gabe hapintoran ni Naibata hita ibagas Ia (2 Korint 5:21.)

Ibagas holong ni Naibata, domma isasap haganup dousanta. Halani ai, pataridahkon hita ma tanda-tanda ni pargoluhon na bayu. Hasangapon ma bani Naibata i babou.

K. Amen. (hundul kuria)

4. Doding: Halleluya No. 148:1-3

Layak do Ham mambere au, o Jesus Tuhankin;

Ihutkon Ham daoh pe au, mambuat uhurhin.

Pardousa na banggal do au, pansing do anggo Ham;

Sai bai na dorsa laho au bai na jahat naman.

O Tuhan, husopotkon ma ganupan dousangkin;

Holong ma Ham, sai sasap ma, Bamu ma tonduyhin.

5. Hata Haporsayaon (Athanasianum)

P. Riap ma hita jongjong!

Saksihon hita ma haporsayaonta in, songon na sinaksihon ni haganup halak na porsaya bani sab tanoh on!

P.+K. Ahu Porsaya....dst Amen. (hundul kuria)

6. Tonah Pimpinan Sinode GKPS

7. Refleksi Minggu Pelajar GKPS: Tubuh Ibagas Haporsayaon, Marbuah ibagas Holong, anjaha Manggoluh gabe Saksi ni Kristus

P.: Kuria ni Tuhan, porlu do hita marlajar sadokah ni голуhta. Marhitei na marlajar, tambah do pambotoh. Marhitei tambah pambotoh, tambah do na boi gabe pansarianta. Marhitei tambah pansarian, tambah do homa hadoharon na boi iahapkon hita. Marhitei tambah hadoharon, tambah do homa na boi iparbuahkon hita. Halani ai, tolu tokoh ibagas Bibel boi mambere usihan banta ase totap sirsir marlajar sadokah ni голуhta.

1 halak siswa/i SD: Daniel aima sada halak na manjalohon bagei ni sibere-bere humbani Tuhan. Boi do ia mangalimhon nipi. Poso, jenges, pandei, marpambotoh, maruhur, anjaha na talup marugas do homa ia. Tapi, halani pandei ni ai, iboan do ia hu huta ni halak. Dob das i huta ni halak, iputuskonni ma ibagas uhurni paboa na so ra ia pabutakkon dirini marhitei sipanganon pakon siinumon ni raja. Bagei do siding pakon sitaronon na ijalonni, pangkorhon humbani haputusanonni ai. Ipamasuk hubagas liang ni singa pe onggga do iahapkonni. Hape, totap do ia manjolom haporsayaonni ai. Lang mubah janah lang taruyun ia bani hinamantin na lang humbani Tuhan. Ase, halak na terpelajar aima halak na tubuh ibagas haporsayaon.

1 halak siswa/i SMP: Ise do hita na lang manandai Josep? Josep aima anak ni Jakob. Buei do saninani Josep on, anjaha ia do niombah sietekan paima Benjamin. Sadokah haetekonni, holong tumang do uhurni bapani hu bani. Tapi anggo saninani, simburu do sidea ganup mangidah si Josep on. Dob ni, ijual saninani ai ma ia hubani halak na legan. Dos songon Daniel, si Josep on pe iboan do hu huta ni halak. Halani saluju janah totap do ia mamparlajari na sintong, roh dokahni gabe roh dearni ma goluhni. Ujungni, gabe sipambobai ma ia i huta ni halak. Mardohar do ia. Ase, sanggah roh saninani laho mamboli sipanganon halani lohei maningting, lang sogam uhurni mangidah saninani ai. Lang idingatini be ganup pambahenan ni saninani ai na mabajan in dompaksi. Holong do na iparbuahkon Josep dompak ganup halak, termasuk hubani diha-dihani. Ase, halak na terpelajar aima halak na marbuah ibagas holong.

1 halak siswa/i SMA: Simon na igoran Petrus, aima sahalak pardengke na idilo Tuhan Yesus ase gabe susian. Itadingkonni do jalani laho mangirikkon Tuhan Yesus. Dohor tumang do ia pakon Tuhan Yesus. Ia do na mangapiti Tuhan Yesus sanggah soridadu manangkap Tuhan Yesus. Ia do homa na isungkun Tuhan Yesus ronsi tolu hali sanggah i topi ni tao Tiberias. Inang simatuani pe onggga do ipamalun Tuhan Yesus. Age pe onggga ia mamparnalang Tuhan Yesus, tapi sintong-sintong do ia manggoluh sebagai saksi ni Kristus. Sanggah i nagori Kesarea Pilippi sidea, nini Simon Petrus ma mambalosi Tuhan Yesus, “Ham do Kristus, Anak ni Naibata na manggoluh in!” Gabe saksi ni Kristus do ia. Ase, halak na terpelajar aima halak na manggoluh gabe saksi ni Kristus. Amen.

8. Mangondoskon Apresiasi

9. Tingting

10.Doding: Halleluya No. 378:1-3

Au idilo Tuhan Yesus, au idilo Tuhan Yesus,

Au idilo Tuhan Yesus: Porsan silang sai ihutkon Au.

‘Ge mardalan bai na golap, ‘ge mardalan bai na golap,

‘ge mardalan bai na golap, huihutkon Yesus in totap.

Jesus do manogu ahu, Jesus do manogu ahu,

Jesus do manogu ahu, huihutkon Yesus Tuhankin.

11.Ambilan: 1 Raja-raja 19:15-21

12.Galangan

Parambilar Paima iondoskon hita galanganta, tangar hita ma lobei hata ni Naibatana gabe onjolan banta laho manggalang, aima na tarsurat bani 2 Musa 35:5, “Patumpu hanima ma hun bennima galangan hubani Jahowa; barang ise na rosuh uhurni, iboban ma galangan hubani Jahowa.”

Sonari ondoskon hita ma galanganta!

Kuria (mandodingkon: Haleluya No. 466:1-3)
Ringgas hita marhorja,
ase torsa marhasonangan goluhta on.
Sirsir do tong Tuhanta,
mambere gogoh lao marhorja hubanta on.
Nai ma da tongon, amen sai saud ma sonin.
Nai ma da tongon, amen sai saud ma sonin.

Horjahon ma rosuh-Ni,
ase dapotan pasu-pasu horjamu in.
Manggargar na sinari,
janah tongtong ihasomani Tuhanta in.
Nai ma da tongon, amen sai saud ma sonin.
Nai ma da tongon, amen sai saud ma sonin.

Bolag openi juma
inganan manaburhon bonih ni Hata in.
Ase ringgas ma hita,
janah tongtong mambere buah bai Tuhan in.
Nai ma da tongon, amen sai saud ma sonin.
Nai ma da tongon, amen sai saud ma sonin.

13.Tonggo pakon Doding Galangan

P Riap ma hita jongjong!
Martonggo ma hita mangondoskon galanganta hubani Naibata!
Ham Tuhan Naibata, simada hanami pakon haganup goluhnami. Tarima kasih ma hatahononnnami hu Bamu, halani iparmudu-mudu, iparorot janah ipasu-pasu Ham do goluhnami. Ibere Ham do homa parhiouon, hajorgiton, sipanganon pakon siinumon ronsi na porlu bani goluhnami. Tanda ni tarima kasihnami, iondoskon hanami do hu Bamu goluh pakon pasu-pasu na dob binere-Mu, na ipatumpu hanami on gabe galangannami. Papansing anjaha pasu-pasu Ham ma on gabe galangan na misbou i lobei-Mu bahen hasangapon-Mu janah mambahen lambin marhataridahan harajaon-Mu i duniaon. Sai tambahi Ham ma pasu-pasu-Mu janah sai lambin paganda Ham ma holong ni atei-Mu hu bannami. Ajari Ham ma hanami, ase lambin igalangkon hanami dirinami pakon hinadongannami hubani harajaon-Mu bahen hamuliaon-Mu, ibagas goran ni Anak-Mu Jesus Kristus, Sipaluah hanami. Amen.

Kuria (Mandodingkon Haleluya No. 5:4)
Bamu sadokah ni dokahni, au on o Jesus Tuhankin;
Ham ma ‘lah haganup ompungni,
gogohku pakon artangkin;
Ai iberehon Ham daroh-Mu,
manggalar utang ni dousangku.

14.Tonggo Ham Bapanami

Parambilan Ham Bapanami na i nagori atas. Sai na papansing ma Goran-Mu. Sai roh ma harajaon-Mu. Sai saud ma harosuh ni uhur-Mu i nagori tongah on songon na i nagori atas. Bere Ham ma bannami sadari on hagoluhan ari-ari. Sasap Ham ma dousanami songon panasapnami bani dousa ni hasoman na mardousa dompak hanami. Ulang hanami bobai Ham hu parlajouan. Paluah Ham ma hanami humbani pangagou.

Kuria (Mandodingkon) *Ai Ham do simada Harajaon pakon Hagogohon ampa Hasangapon sadokah ni dokahni. Amen.*

15.Paingkatkon

Parambilan Laho ma nasiam, janah “Ulang ma surut ringgas ni uhurnasiam, hinsah ma ibagas tonduy, sirsir ma mambalosi Tuhan in.”

16.Pasu-pasu

Parambilan Jalo ham (*hita*) ma pasu-pasu humbani Tuhan Naibatanta:
Ipasu-pasu anjaha iparorot Tuhan Naibata ma ham (*hita*).
Isondangkon Tuhan Naibata ma bohi-Ni hu bamu (*hu banta*) janah maidop ma uhur-Ni mangidah ham (*hita*).
Idompakkon Tuhan Naibata ma bohi-Ni hu bamu (*hu banta*) janah ipasorap ma damei-Ni bani tonduymu(*tonduyta bei*). Amen.

Kuria (mandodingkon) *Amen. Amen. Amen.*